

四庫全書

集部

欽定四庫全書

集部

南澗甲乙稿卷一

一至三

詳校官庶吉士臣范逢恩

主事臣呂雲棟覆勘

總校官進士臣程嘉謨

校對官編修臣吳舒帷

謄錄監生臣金際會

欽定四庫全書

集部四

南澗甲乙稿

別集類三 宋

提要

臣等謹案南澗甲乙稿二十二卷宋韓元吉撰元吉字无咎開封雍邱人南渡後流寓信州之上饒集中自署曰潁川不忘本也元吉宋史無傳陳振孫書錄解題稱為門下侍郎韓維元孫江西通志則以為韓維之子攷宋

史維本傳卒于元符元年而集中繫辭解序
云淳熙戊戌年既六十有一則元吉生時自
在徽宗重和元年上距元符元年戊寅凡二
十年安得為維之子集中又有高祖宮師文
編序稱紹聖中公謫均州又稱建中靖國以
來追復原官與維事蹟一一相合知江西通
志為誤當以陳氏為是矣陳氏又稱其初與
從兄元龍皆試詞科不利後官至吏部尚書

而不詳其事蹟今據其赴信幕詩知初為幕僚據其送連必達序知嘗知建安縣據其謝表狀劉知在外嘗為江東轉運判官兩知婺州又知建寧府在內嘗權中書舍人守大理寺少卿為龍圖閣學士為待制為吏部侍郎中間一使金國兩提舉太平興國宮及為吏部尚書又晉封潁川郡公而歸老於南澗因自號南澗翁併以名集南澗者一在建安城

南為鄭氏別業見本集詩序一在廣信溪南
見書錄解題攷元吉宦於閩中家於江右似
乎非建安之南澗當以廣信為是也元吉本
文獻世家據其跋尹惇手蹟自稱門人則距
程子僅再傳又與朱子最善嘗舉以自代其
狀今載集中故其學問淵源頗為醇正其他
詩文酬酢者如葉夢得張浚曾幾曾丰陳巖
肖龔頤正章甫陳亮陸游趙蕃諸人皆當代

勝流故文章矩矱亦具有師承其壻呂祖謙
為世通儒其子名澆字仲子者亦清介自持
以詩名於宋季蓋有由矣朱子語類云元咎
詩做著者儘和平有中原之舊無南方啁哳
之音誠定評也集本七十卷又自編其詞為
焦尾集一卷文獻通考並著錄歲久散佚今
從永樂大典所載總裒為詩賦六卷詞一卷
文十五卷統觀全集詩體文格均有歐蘇之

遺不在南宋諸人下而湮沒不傳殆不可解
然沈晦數百年忽出於世炳然發翰墨之光
豈非精神光采終有不可磨滅者故靈物爲
訶得以復顯於今歟乾隆四十九年十一月
恭校上

總纂官

臣紀昀

臣陸錫熊

臣孫士毅

總校官

臣陸

費

墀

欽定四庫全書

南澗甲乙稿卷一

宋 韓元吉 撰

賦

萬象亭賦

有序案集中葉少保詩注云公在閩中作萬象亭草為之賦則此題應有亭字

原本脫去
今据補

紹興十有三年石林先生自建康留鑰移帥長

樂惟公以文章道學伯天下推其緒餘見於政

事時閩人歲饑餘盜且擾曾未易歲既懷且威
倉廩羨贏野無燧烟民飽而歌乃闢府治燕寢
後築臺建亭盡攬四山之勝字曰萬象公時以
宴閒臨之命賓客觴酒賦詩以紀一時之盛某
適以舊契之末獲拜公於庭知邦人之德公而
公之能與共樂也退而為之賦其詞曰

石林先生治閩之初邦人詠歌延覽登眺臨城之阿面
長江之迴旋俯重嶠之嵯峨剪凡草于荆杞發層臺之

新基收攬宇宙以萬象而目之先生曰天地之內所謂
景與物者不可以既也方其交于吾前而其象無窮觸
于吾心而其意無窮惟達者可以道會而不可以知通
矣斯亭也處于戶庭重複之末而出於闐闐膠擾之中
危梯直上十尋倚空窺井邑之鱗次張九衢之飛塵囂
聲四起人烟繽紛勵絲竹之餘響郁椒蘭之清芬當其
連山如環秀色四出林巒鬱其映帶烟雲度而髣髴陰
晴變態所獲非一極東南而凝睇莽游目于窮髮海波

蕩漾蛟龍驚獮絜朝日之初升數山川於異域颶風角
於天際卷千帆之飄忽或一瞬而千里或窮年於咫尺
瞻雲鵬之獨運哀斥鷃之短翼天池俟其九萬羌決起

于蒿蕪

案莊子我決起而飛搶榆枋又云翺翔蓬蒿之間此運用其語而改蓬蒿為蒿蕪攷詩傳葦蕪

蕭也郭璞曰今蕪蒿也義與蓬蒿可通但蕪是九泰韻與上下句用陌錫通叶者不合疑有誤白鷗去

而西飛澹長烟之遠沒田疇俯見禾黍如績耕夫耦而
長謠牛羊散于砂磧餘霞被於林杪明月皎其東壁掛
北斗於欄楯瀉銀漢於雉堞披風露之冷爽想飛仙之

來接聽雞犬于雲中奏笙簧之激越嘆佳賞之奚盡雖
妙意其莫述惟吾興之所寓與彼物而所得故可以追
閭風之遊而謝華胥之國也客有間而歎曰嗟嗟先生
百代之英玉堂金馬載蜚厥聲厭帝所之鈞天歛光芒
于一藩而餘風所被猶足以息潢池之盜而慶高廩之
豐年矣今夫此邦之形勢最于八州繚周垣其百里渺
澄瀾而為溝三峰峙而鼎足蓋有類夫蓬萊與瀛洲自
無諸迄今千有餘載中更王氏窮侈自泰異時離宮別

館乘山矚海而今之所存大則浮屠老氏之室小則公卿大夫之廬鳴鐘相聞擇勝以居飛欄危榭往往而在倚巖壑之幽清翳松檜其庵藹雖一斑之或見曾未若斯亭之宏大碧油畫戟來藩此府佳賢近臣蓋已百數慨登臨之遺跡咸褊陋而無取獨先生至而有之舞山光於簾幙馮地勢之襟帶雜支離之萬種爛錦幄其旒旆薦醺醺于樽俎剥珍錯之螺貝發角徵之清唱挽行雲於天外使邦人聚觀白首驚拜豈吾先生浩然之氣

六合為隘蟠萬象于胸中耿星辰而不寐遇至美而一
發借佳名以自快而景物之來適際其會彼千古而莫
識信一時之有待者耶于是先生聞之輟然而笑衆賓
避席迭起為壽

拙蠶賦

壬寅
年作

韓子晨起視牕中有物延緣投隙抵穿口如飛蛛足若
蟄蛭呼嫗輩問之嫗笑曰是拙蠶也絲疏而弗績食飽
而嗜眠亡所用旃戲置此焉韓子感而賦之曰翳樗櫟

之不材兮信能保其天年豈有用之則貴兮抑不用之
或偏吁造化者奚私兮蓋亦賦之自然惟桑蟲之何知
兮生蠹蠹而比肩資採摘而不自養兮甘鼎鑊之烹煎
大則施于紈綺兮細則麗為純綿雖曰衣被四海兮猶
為蟭蛄之所憐方衆巧之競驚兮萬族仰哺而爭先何
繭栗之弗為兮耻營軀而自纏匪畏死而遁逃兮將羽
化而飛翾宜婦姑指以為拙兮塞冥心于棄捐彼莊生
取喻於犧牛兮支離攘臂於兵間不能務悅於人兮殆

亦自全其天聖有抱璞而深藏兮時有不爭于尚賢粵
撫檻而三歎兮吾亦樂乎太玄

湘竹賦

余懷古而不見兮將弔舜于九疑望湘江之沄沄兮憚
褰裳而涉其涯款二女子于叢祠兮庭有翠篠而參差睨
枝幹之攔珊兮淡猩血之淋漓手欲觸而不敢兮心欲
置而復思故老諗余以前聞兮此皇莫之淚痕帝遐征
而不復兮淚潺湲于竹根朝日暴而不滅兮嚴霜洗而

不昏度淒風之蕭瑟兮如有餘哀之遠聞彼聖人其亡
欲兮豈暱嬖而惑私雖釐者其抱情兮何一哀之至于
斯夜將寢而太息兮夢恍惚其見之委玉佩以弦琴兮
有美一人其頎顰青蛾而啓皓齒兮肅予前而致辭曰
吾父之至仁兮擇吾嬪于有虞惟虞之能繼帝兮功甚
巍而不居藝稷黍于艱難兮派百川而東駛制禮樂與
法度兮世蓋躋于極治憂勤終以損壽兮南巡五月其
未已乘白雲以逍遙兮無復帝車之可還悼予躬之至

弱兮撫予涕而長嘆考殂落而夫逝兮予之息又不令
天下其將安歸兮生民又安取正息既不任于養兮嗟
予死其孰瘞天既高而莫升兮地之厚其可入寔念此
以長號兮涕交墮而弗知滋草木以如雨兮與江水之爭
流惟此君其諒余兮含余淚之莫收歷千祀而弗改兮
亦其節之素修彼昧者其騰口兮殆妃嬪之後先抑予
哭猶罔于夜兮顧于此則豈然嗟神言之諄諄兮羌不
知其夢也且端拂以求諸神兮雖龜筮其不貳也退而

告于君子兮咸舉以爲信也遂再拜而謝之兮吾將敬而植此也

辭

羈鳳辭

我家既遠兮莒水爲鄉中有羈鳳兮飛頡頏朱爲冠兮
黼爲裳五色炳兮耀文章音律呂兮韻宮商竹不實兮
梧則僵翳蒹葭兮飮稻梁虞舜作樂夔在堂集阿閣兮
麗朝陽胡爲去我兮天一方友鳬鴈兮侶鶯鶯吁嗟鳳

今其來翔

五言古詩

遠遊十首

我行蓬萊巔
俛首見月窟
誰言滄海深
涉之不濡轡
頽波驚魚龍
起舞相蕩潏
衆真爲一笑
黃霧生絳闕
獨乘風中天
蹙踏波上月

東隅有神人被髮兩目丹
手擎扶桑枝
騰光射乾坤
朱鳥爲前驅
火龍駕後軒
祝融不敢瞬
衛以千炎官
誓當

掃霜霰九寓常不寒

露出九地底化為萬鼓輦豕首柄石斧剗然四海馳夔
魑與罔象辟除靡有遺無私乃帝令風雨多隨之苟能
仆夷伯何怨兒女爲

紫皇宴瓊臺鳳舞鸞且歌翠鬟兩仙女倚歌奏雲和秀
色炯雙壁晴雲灩秋波曲終顧我笑奈此人間何贈以
白玉環綢繆期匪他

大鈞轉一氣急轂無停轅是非與生死膠擾于其間朝

昏互變滅倏忽千萬年豈知達道人直作須臾觀天地
本無物置之奚足言

海水赴大壑雷奔墮空虛火輪煽金剛蕩然爲尾閭一
闔復一闔乾坤猶戶樞萬生保靈根至神守虛無嘗以
物所歸返觀天地初

崑崙九萬里磅礴天地根其下有玄圃茲惟衆仙門翩
然兩白鶴道我前飛翻問津牽牛星濯足洪源河九闔
幸方關乘之遊紫垣

巨軸載厚地沈沈惟九幽日月所不燭鬼神或拘囚負
臣與支祁亦爲舜禹憂覩彼世上兒對面行奸偷國章
幸可脫天刑此焉投

生死一大夢夢覺誰當分夢中既不了雖覺何足云天
光發吾字澹然無朝暉至樂不外假至貴斯無文求仙
與學佛舉世徒紛紛

呼吸爲陰陽動靜乃天地猶然一身間至理無弗備蒼
龍駕白虎晝夜分六氣坎離會精神否泰本仁義吾師

不吾欺持以御一世

戊辰三月清明後三日見葉文于石林承命賦詩

作古風一首

案葉少蘊字夢得石林其居也少蘊爲元吉前輩故稱葉文原本作文謄

今改正

東風易陰晴一雨曉便止捨舟欣徐行烏鵲聲爲喜
崑石林谷蒼翠間紅紫丈人厭調元玩意丘壑裏
鄭公化鄉閭鄴侯盛圖史千載發詞源一點詣真理
霞裾月中仙珠履天下士時從詩酒樂不負湖山美
方腫照玄

髮眉壽端自此緬懷西湖春荆棘迷故里兩髦看公遊
玉節旋屢弭風塵三十載碌碌類餘子晚登載欣堂譽
欵聞正始榆枋望天池奮迅思決起當謀白雲居敢援
赤松比臨沅整遊觀三沐聊洗耳

子雲兄命賦祿隱

子牟居江湖而有魏闕心方朔待金馬與世相浮沉古
來曠達士豈必棲山林吾兄官湖南一室橫古今朝披
祝融高暮涉湘水深閒爲漫郎飲戲效愚溪吟聖賢雖

云邈異訓夙所欽
斗水幸見收西江
等蹄涔吁嗟咸陽
市敝帚希千金應
攜忘言子一和無
絃琴

題畫卷

少年喜登臨兩腳
不憚軟支筇上雲
山得酒輒三返一
從老將至所向意
先懶豈惟心事乖
要自腳力短不如
空齋坐此畫一舒
卷超然函丈間意
作千里遠漁舟已
逍遙茅屋更蕭散
江干所遊歷物色
猶在眼浮生固幻
景況乃幻中幻低
頭顧吾廬何如住
山澗

梵隆大師乞詩隆能琴阮為鼓數行

扁舟望涵山一塔白雲裏東西互迎送目盡三十里下
有布金園軒牕面流水上人富願力物物盡經始莊嚴
萬人緣功就只彈指空齋了無事鳴琴對清泚游魚應
朱絃萬籟入流徵我來不忍去一聽賞幽耳雨餘新月
上雲物紛可喜莫作箕山吟秋風坐中起

逢人

逢人似相識初不辨名字折腰致寒暄但道久睽異歸

來省眉目鬢髯猶夢寐自非知心交君輩定難記將無
半面別正恐呼聲似中年況多忘錯認固無意典刑要
深思摸索豈難事尚想睢陽公一見了奴隸

寒食前三日攜家至丁山

春事已過半豫懷風雨憂苦無親朋樂自攜兒女遊丁
山峙城南老稚載一舟狹徑登詰曲軒牕居上頭遐觀
接去鳥俯視臨清流溪花正爛漫堤柳綠且柔杳靄烟
雲間前瞻帝王州田野亂碁布山川莽相繆病妻不能

金方日入
卷一
飲取酒自勸酬鮮妝誰家婦造席為我謳風光亦可醉
景物似見留惜無百金資買此林壑幽歲月實易得里
閭尚沈浮歸來暮鐘響蘋風動滄洲

上巳日王仲宗趙德溫見過因招趙仲縝任卿小
集以流水放杯行分韻得行字

春事倏已晚飛花送啼鶯長安三月三水邊盡傾城緬
懷杜陵老感之見歌行青鳥忽飛去素鱗盤水精往事
誰復識夢繞白玉京竭來官閩陬江湖渺餘情嘉節閑

門臥客愁隨日生風光入樽酒使我嗟獨傾良友慰寂寞
寔惠然成會并金枝三雋才千里未可程王郎烏衣舊
高論玉塵橫相逢寄觴詠樂此天氣清不知山陰會絕
唱疇能賡庭隅有幽花粲若萬玉纓好風亦知人微月
相與明蕭蕭城東路頗復歌吹聲景物正自佳天涯意
難平不須恨陳迹且用催詩成

上巳日與客遊張園

簿書有餘閒春日亦已永況逢佳節休朱墨得暫屏名

園跨江郊危檻俯千頃平蕪雨初勻弱柳風自整芳尋
寄蕭散意適忘醉醒持觴挹花色散策步林影雖無歌
舞妍所愛亭館靜佳辰天氣清泉水助幽冷緬懷山陰
會脩竹帶崇嶺應知佳客臨懷抱均一騁君看結綺地
茨棘翳胥井當時擘牋人正復對此景江山幾興廢歲
月侵老境但願中聖賢疇能計鐘鼎

避暑靈泉分韻得水字

閒居亦無營歲月駛流水適聞新蟬鳴裨暑遽如此佳

哉二三友久要復鄰里憐我疾病除慰我懷抱喜居然
肯見顧岑寂聊啓齒空山百無有翠阜映清沚幽泉俯
伴月盎盎真石髓坐久得清涼山鉗還屢恥一杯樂所
遇靜勝有真理誰能走懸箔趨門趨朝市炎歊不可觸
暑雨欣漸止幸有故人風相過時洗耳

七夕與孟壻約湯朝美率徐行中遊鶴山

城市競時節幽尋固難同舊聞鶴山奇欲往歲屢窮茲
辰尚殘暑夙駕乘西風楚俗候飛鵲階庭聞兒童誰能

事針縷覓瓜果中起攜東牀友況得下榻翁青蒲有
傑客放懷適相從一招雲中仙共呼潭底龍翠壁聳嶮
峯龜魚澹遊空泉源幾萬斛石竇藏豐隆久知神物交
解致零雨濛我田甚無多例思年穀豐公才正類此時
至會有庸竹間小招提閒靜無鼓鐘枕石漱甘井荔丹
啓筠籠若據兩石羊摩挲古狄銅高談劇霏屑壯氣吹
長虹可無樽酒綠遂使老頰紅醉語或不省嘯歌亦春
容歸歟興難盡月明照風松

雪中以獨釣寒江雪分韻得獨字

常年待三白此語未免俗誰言歲將徂一雪自云足
魑妖與癘鬼不待巫蒯逐初喜沒馬蹄還驚上牛目
三日雪不休冰澌被茆屋我貧固無事尚賦一囊粟
長饑望年登政恐麥不宿天公豈相撩饋以萬頃玉
朝來一堪煮茗椀薦新菊牕中有佳致一水臥寒綠
城闌閒在眼汎復見巖谷相過二三子共喜醅甕熟
狂歌且暫醉夜半還秉燭猶勝杜陵翁山中掘黃獨

雪中從邢懷正乞酒

櫺具高柱頰風塵客長安長安不宜客歲暮仍苦寒夜
聞陰風喧曉看雪漫漫天公非惡劇笑我貂裘單坐令
歌南山白石空巘屹正不妨我嘯憑高事遐觀四海同
一雲更覺天地寬平湖發遠景松竹如龍鸞巉然兩峯
高玉峙峨瓊冠緬懷邢公子重城有家園水石帶林沼
幽亭厭雲端仙粧映疎梅秀色若可餐璇題散冰筍晶
鹽貯牙盤清歌出絕唱筆間走波瀾幾欲泥君飲持杯

聽幽蘭君家碧琳腴到手無復殘正豈須羔兒尚能追
清歡蹇驢不敢出強作哦詩酸詩成不能寐起舞清夜
闌儻可致麴生當築白玉壇

自國清寺至石橋

出郭天驅氣陰車日亭午漫漫山中雲猶作衣上雨仙
山八百里勝槩隨步武稽首金地尊樓心玉京侶浮空
方廣寺樓殿若可睹石梁瀉懸流下有老蛟怒我來淨
焚香千花發茶乳擬訪林下仙飛來但金羽

巖泉道中

出郭心易清看山眼難飽
疎疎水中梅殘雪相與好
歲華云已晚官況良自笑
日暮城東門霜風動衰草

龍谿巖

丙寅
年作

蒼崖兩分張絕壁千丈起
溪流忽奔注萬石相披靡
跳波作驚雷跬步清見底
攀藤上巉巖卻立半空裏
幾年天師廟欄柱岌無址
幽禽答遠響山花亂紅蘂
我來不知疲危棧劣容疑
同僚具壺觴脚軟正須此
塵埃得遐

矚真賞契心耳只應潭中龍見客亦驚喜

寒巖分韻得水字

青山如幽人不肯住城市客從城市來一見消吝鄙
平時與周旋況復非俗士我初見南山秀色紛可喜
謂言官塵埃洗滌端在此經時未一至引望若干里
昨朝得休暇佳興難自己秋原麗新晴景物為清美
獨遊已不惡更約二三子初從澗壑危稍入巖石倚
白雲隨杖藜蒼烟生屐齒主翁亦好事結茆脩竹底
庭空百無有屈

曲但流水客來了不問花草自紅紫豈無一樽酒欲飲
還遽止歸鞍不可速吾亦聊洗耳

松江感懷

忽忽倦行役栖栖問窮途生涯能幾何所抱詩與書淒
涼吳淞路不到十載餘當年路傍柳半已陰扶疎繫舟
上高橋春水正滿湖鷗鳥如有情見人遠相呼境豁目
為縱興長心特舒尚想張季鷹此馬賦歸歟生前與身
後底用論區區但當酌美酒一鱸江中鱸

丁丑仲春將渡浙江從者請盤沙予畏而不許既
登舟乘潮以濟中流膠馬捐千金募數力竟至沙
上僅達西興狼狽殊甚從者笑之感而賦詩

桑田變東海此語聞自昔嗟我百年人耳目詎能識誰
言錢塘江遂有車馬跡漲沙莽雲屯衣帶僅尋尺我初
未渠信東轡俟潮汐是時月既望春晴好風色同舟二
三子擊楫意頗適中流類坳堂竟作膠柱瑟褰裳亂濤
波植杖負囊笈居然濯我足長堤慰行客西興忽在眼

喚渡猶頃刻鯢鵬定何之魚龍豈遷宅斜陽照高岸得
酒餞寒濕平生忠信懷對此徒感激翻成僕奴笑撫事
吁莫測莫問曲池平空悲峴山側

望靈山

嶽鎮古所錄茲山諒其遺憶從西江來恍惚欣見之初
疑春雨晴雲物出怪奇稍稍對巖壁森森面嶺奇紛紜
類列障散漫如連帷磅礴千里間衆景皆奔馳頗訝地
軸湧未覺天柱虧不讓崑崙高遂使泰華移諸峯七十

二磊砢略可推駢觀擁佛髻遠睇凝蛾眉大或覆鐘鼎
細亦銛刀錐石櫃一何高梯天此為墀崩騰鐵馬羣中
有大將旂身居萬石貴氣壓累卵危雄傑亦莫狀清深
亦餘姿蛟螭護絕磴草木忘四時豈知水晶宮闕藏神
所司陰崖彼何靈頸斷不敢悲

建安城南鄭氏居號南澗山水甚幽予始至欲遊
率奪以事秋九月事少閒前二日折簡招客客畢
辭旣命駕辭者復先在相與追逐詰曲由田中梁

溪並山麓隘不可興行二百步始得寒巖磴磴
羊腸而上鉅竹生石間舉武疲曳休小亭至上方
牕戶明邃從疎林瞰遠山如綺䟽中望通衢也西
漸走水養魚植菖蒲石上纖巧可愛有僧矐甚云
山故銅冶也指其穴已累篝火之跡亦猶在山半
有巖隔小澗橋壞不可越門有水閣平田秋色稼
穡彌望主人畏客戒勿置酒因取茶烹之求觀其
園三返僅得入則流觴亭初為坳沼亭中稍集亭

下水車輪轉別亭俯方池環植海棠少坐日已西
攜酒詣開元僧廬絕溪而南中流見城市水面平
直如大江舟銜尾槳聲相上下意樂之集丹青閣
閣底巖桂盛開面之置樽俎將登陸羽亭憊不果
取泉試小春新芽舉白歡甚分韻賦詩明日又以
秋氣集南澗為韻自賦五首云

朱墨日過眼溪山誰復遊夜聞西風喧起看天地秋王
事有休沐駕言指林丘新晴鳥鳥樂路入南澗幽高峰

左右列野水縱橫流問舍苦不早求田亦良謀

高岳跨層巔一徑入蒼翠三休徹上頭卻立睨平地當年寶藏興中夜出光氣至今石縫裂篝火尚能記盈虛誰可測開闔神自秘空房有殘僧骨冷夜無寐

入山衣屨寒出山衣屨濕初迷烟雨來稍識雲氣集空濛掠面過可玩不可執不知市廛地去此凡幾級青松入長望白鳥伴危立冷然笑身世萬事何汲汲

有酒不得飲呼船過溪南溪南亦何好古寺依晴嵐上

有百尺樓下有千丈潭城闌一目盡晚山日相銜烹茶
弔陸子蠟屐登巉岵相逢作行樂猶勝空坐談

秋風何時來午暑忽已散娟娟木犀花弄藥亦璀璨清
香不自惜擁鼻得奇觀古來達道人至樂在山澗藝蘭
與種蕙採掇契幽願置此勿復言吾方困遊宦

李仲鎮懶窠

癸未
年作

我性天下懶自謂世莫雙竭來官中都懶極濟以憊有
如千黑魚東西轉橋砒又如橐駝臥厭逐羣吠尨鼻洩

任縱橫胞轉徒胥肱紛紛夸奪兒見我語輒哢平生李
公子老大同鄉邦奈何奪我有收歛付一牕作窠寓以
名異音乃同腔金馬可避世何殊鹿門龐君看富貴塗
機危甚緣橦爭榮僅錨銖力欲九鼎扛金朱擁丹轂視
之亦螻蟻愛君陽羨居有田種蘭茝溪山帶城郭松竹
環旌幢連娟幾脩眉清歌艷明釭客至即盡醉不待金
石撞尚餘詩語工詞源倒三江好懶得真懶使我心益
降何時半作分臨流聽瑯淙

趙仲鎮梅川

堂前面羣山堂下俯流水揚雄一區宅歲晚何在此將
無山水佳更為風物美城隅三家渡華屋照清泚舉手
招梅仙低頭叫陸子前松後梧竹左桂右蘭芷江花漾
茶甌巖樹排棐几客來索無有樽酒間圖史不作隱士
廬合號君子里吾人天潢秀時至當決起飽餐南嶽芋
閒曳東郭履山名不負儂因之得名字彈冠可前卜問
舍真早計笑殺陶淵明酒資良未遂

題鄭舜舉蕉庵

吾州富佳山脩竹連峻嶺居然縛塵埃一見輒心醒豈
知刺史宅跬步闊清景古木盤城隅石徑幽且迴當年
徐常侍坐愛雲水冷溪南羣峰秀轟轟雖出潁鄭公閑
閣暇獨步毘廬頂曰此氣象殊逍遙步方永喚客倒清
樽燃薰煮奇茗庭空無一事賓吏絕干請佳處由漸入
斯語煩記省淵明嘗有語結廬向人境恍如白蓮社揮
塵對宗炳誰云忙裏閒要識動中靜我來款妙論散策

步林影心田豁叢茅氣馬罷征騁他時記棠陰老意亦
深肯

朱元晦清湍亭

青山足佳遊遠睇欲無路稍尋絕澗入始辨雲間樹泉
聲若招客倚杖得夷步驚湍瀉亂石激激有清趣風微
鳥哢幽日徹魚影聚居然魚鳥樂正欠幽人住野僧豈
忘機作亭以茲故因君賦新詩我亦夢其處

題潘叔玠家達觀亭

車塵蔽重城俯首但闌闌誰知達觀亭自與空闊對青
山接簷楹白塔見雲外迢遙眼界淨妙處心境會平生
九垓期洗耳聽天籟一為簿領縛局促無可奈每憑君
家欄曠若解鈴鈇躋攀得遐矚頓覺天宇大頗慚北山
移欲賦楚臺快泰然發天光閒目了無礙

列岫亭用范伯升韻

自我來南溪池塘幾春草結茅依雲端愛此山回抱奇
峯七十二羅列景逾好豈殊謝公牕澄江更縈繞孤城

千家色一目可盡了植葵思夏深種菊待秋杪物華靜
中見至理得深造東山與魯郊底用評大小平生丘壑
心計拙詎能巧亭臯遠俗客曳杖日頻到簞瓢樂未改
在澗槃亦考況有吾人詩飄然異郊島

凌風亭

按集中有凌風亭事狀

西山如層城壁立有堅對逶迤雉堞出一水相縈帶誅
茅發頽垣偶與嘉景會天風無邊來雲日為破碎誰能
了頽末直欲跨鵬背飄然壓塵土九壤真一塊王喬幸

齊驅禦寇亦同載不知吏役縛且樂公事退春光到花
木欄檻愜清快相期睨南溟整我飛霞佩

丹青閣

傑閣跨虛壑危欄轉層峯城郭麗朝暉山水涵秋容幽
尋適暇日況有佳客從微官厭趨走野性便疎慵少攄
泉石願一洗塵埃胷卻上陸羽亭褰裳踏風松東軒俯
喬木高花爛芙蓉感此節物換愧爾樵漁蹤清談且蕭
散酌飲亦時供興闌勿遽嘆勝遊當復重

清暉閣

臺府填都會乃與山水期青溪帶秦淮渺若萬頃陂主
公金閨舊官曹日追隨閉閣理萬事朱欄俯連漪晴波
納遠景搖蕩扶桑枝浩然江湖興頗與漁釣宜風月朝
暮佳軒牕有餘姿向來非無人未發此段奇嗟我老病
軀時來矚須眉停杯待舉網屢醉倒接羅意適反無語
欠公壁間詩只今入幽夢官居類雞栖公亦那久留濯
纓詠來思不知鳳凰沼何如習家池新霜著羣木歸舟

颺旌旗寄言坐上客酒至幸勿辭

溪山堂次韻

幽人誰與娛作堂面溪灣堂中有山色朝暮來雲間正
作杜老狂頗異韓子姦超然物外景便覺非人寰登臨
得遐矚似破天壤慳詩成隱几笑溪山亦開顏繚繞明
鏡中參差峨髻鬟苦無俗客語但聞鳥間關出門曳藜
杖賴有此往還虛名兩蝸角自開觸與蠻時平衆賢聚
君胡得長閒會從車騎出勒石燕然山正恐萬里塗高

轅不容攀

歸樂堂

按朱子文集載歸樂堂記云予嘗為吏于泉之同安而與遷游朱彥侯實同僚即此

也堂

百歲自逆旅微官更周沅應知歸來樂不減萬戶侯淵
明一縣尹折腰憎督郵松菊繞東籬田園事西疇素琴
酌樽酒稚子相獻酬朱侯青雲士頗復有此不方為功
名驅乃與賢達侔築堂寄閒暇笑談指林丘蕉黃間荔
丹蟠山薦新筍嗟我實何人市朝亦淹留因君動佳興

擬作汗漫遊安得二頃田可卧百尺樓

護國寺次前婺州韻

雙娥渺雲端流水但空谷尚喜雲外山娟娟作眉綠佳
人不可見夜半風滿竹竹聲入清夢夜客慰孤宿山中
富蘭若欲往寧畏獨老僧亦知人逢場共竿木林芳得
清心幽澗供濯足便可賦歸歟簞瓢勝鼎肉

喜呂令防歸

閒居玩編簡蕭然罕朋儔古士信可佳欲語不見酬豈

如平生交臭味能相投別久得會面笑談解人憂況君
復比鄰共此一壑幽招邀接步武文字資討求昨朝喜
君來快若沈疴瘳開口四五笑疊疊談未休鷄鳴任風
雨疇能記窮愁因知名教地至樂真天遊新涼動梧竹
柴門掩清秋三徑無雜華菰葵散金甌年豐魚蟹熟樽
酒亦易謀相過勿厭數此外俱悠悠

毛文仲惠文編

平生毛公詩訓傳固已久紛紜齊魯失浪自開戶牖至

哉一言蔽可用嚴墨守淵源見雲仍夢澤吞八九雕章
與棘句錦繡間瓊玖疑如犀始擢粲若蚌初剖肉食乃
聞韶晝日或見斗三百篇未忘七十子何有應如摩天
刃要是修月手時來豈無用妙處端不朽君看夸奪兒
在後孰顧叟喧啾蛩負戶嘈噴蟬陰柳誰令口鳴悲正
使心欲嘔豈無熊羆士底問牛馬走宕堯金閨門豪傑
自先後而君尚窮滯履敝衿見肘才名三十年骯髒驚
白首我慚拜嘉賜幼婦連蠶白相望百里遠曾未共樽

酒期君頌中興步出次山右

寄趙德莊以過去生中作弟兄為韻七首

悠悠功名期冉冉歲月過勞生閱半百僅爾脫寒餓山
林有夷塗此責當萬坐閉門歌陽春非君諒誰和

憶昨鍾山來君亦湓浦去今年赴湓浦鍾山復君住出
處每相似屢觸衆狙怒毀譽久自定子賢吾亦庶
士苦不自重貪名乃忘生向來望塵子得車定何榮浮
雲蔽天壤豈碍日月明惟餘金石交可論藏與行

築城始議戍寓兵復言攻二年大江南兵戈在目中憂
時亦千慮惟子與我同詣闕請長纓終軍本兒童

我初見君詩謂世無此作飄零三十年文思各衰落俱
持使者節恨別還作惡未置白玉堂端須著巖壑

我生少孤貧四海兩兄弟拊嫗賴母慈離別幾揮涕宦
遊與夫子中外輒相值所恨姓氏殊孰云情好異

處世那近名居官敢言清平生阿堵物疇能字之兄春
風一杯酒與君花下傾窮秋動搖落江湖渺離情

送湯朝美還金壇

騰駒輕卧駝野蔓欺落木舉頭便干霄春至亦重綠人
生百年內萬事紛過目得為蠖步伸失作蠅頸縮古來
曠達士一視等蜚觸功名本時命用舍豈榮辱湯公涉
南荒歲月猶轉轂幾年卧新州寧肯事雞卜身安一瓢
飲志大五車讀揭來靈山隈楚然慰虛谷濯足山下泉
愛我泉上竹相從一長笑忍效阮生哭胷中經濟略欲
語動驚俗誰知天意回歸棹如許速春風正浩蕩江水

清可掬海濤拍千峯挂席下浮玉遙欣倚門念三徑歡
僮僕送君得無恨我步嗟局促要看萬里途更試簫雲
足家山幸毋留吾皇思陳牘

送湯安止罷信幕赴調

後生仰前輩今世思古人豈重歲月久所懷風俗淳昔
我家閩中龜山實其鄰出門尚羣盜欲往志不伸相從
朋舊間得語盡可珍俯仰今幾何遺編半埃塵白頭入
幕府始與夫子親夫子龜山裔麋鹿見祥麟晚同柱後

史無心問平津典刑在眉睫溫然異羣倫向來簿領中
挾書聽諄諄豈不開我塞異聞此其真亦或舉樽酒笑
談忘賤貧同僚各分散世事日以新遙憐鄭公鄉俎豆
猶莘莘彈冠定不苟家庭有書紳道學固未泯吾謀復
誰陳尚想金馬門西湖醉餘春

送趙任卿蕪湖丞

青山照濡湏江駛不可渡當年黃鬚兒跨馬識其處
雄有遺跡草木尚西顧孤城千家邑政爾橫故戍翩翩

佳公子儒雅稱風度金門向蓬萊曾未試闊步疇令一
官卑僅乃高尉簿得非多言窮定坐能詩故相從十年
間了不見喜怒千金第深韞至寶可輕付江山落君手
判斷得佳句誰歟招得仙我欲起謝傳似聞王師出輦
鼓近營駐老生固常談愚者亦千慮一樽別時酒且用
慰遲暮去去無久留功名有夷路

送杜少卿起萃知遂寧府以高名千古重如山為
韻七首

男兒生世間身名要俱高苟不得其所富貴輕鴻毛古
來獻言士忠嘉極變臯尚友千載餘斯心豈徒勞

十年天壤間久矣聞公名詞華少陵系臭味修水甥一
著獬廌冠讜論驚縱橫九卿固美秩不如偃專城

國朝御史府一代名多傳暫退或久庸始愚亦終賢得
失安足論俯仰歲已遷但存愛君心豈憂時命遭

厚味得無毒良藥信多苦毒留患滋生苦過疾自愈吾
君堯舜資事業方復古公行幸遲遲去國猶去魯

靈旂出江淮犀甲下秦隴先聲敵已寒百戰有餘勇手
敵權貴避膽落將士懍誰歟任司直用舍繫輕重

西京蜀都望淵雲暨相如節誼知不足文章焉取餘凜
然見風采吾非斯人徒我我眉山陽不但聞三蘇

征帆轉吳楚涉江指岷山富貴歸故鄉昔人以為難大
府固可樂高風亦難攀豈必待政成甘泉行賜環

清曠亭送子雲得有字

歡期苦難逢離別乃易久天涯老兄弟況復親白首田

園固不足功名亦何有今年送兄行正爾作太守池陽
古名郡地控大江口舟來武昌魚車載桑落酒登臨得
齊山端不負重九公餘亦堪樂尚有此客否天威動江
淮狂寇行授首努力幸馳驅腰看印如斗

別子雲

離觴不解醉愁多令酒醒別懷亦云惡況此兄弟情春
風釀寒雨十日未肯晴回頭易千里江南短長亭

次韻韓子師遊三洞過赤松

山城一雨足水滿高下塘好風從西來蕭然終夕涼
彼池間蓮當軒洗紅粧官事無時休涉筆鴈驚行豈知
青雲客夙駕遊寶坊坐厭市井塵步尋松桂香陰崖有
靈湫玉簡帝所藏摘石收澗碧梯空擷林芳金盤薦麟
脯冰壺注瑤漿更語妙道根寶篆開函琅路轉九曲溪
著足千仞岡舊聞井中丹清宵發神光直欲餌碧霞誰
能擣玄霜朝來得君詩險韻句復長使我鴻鵠心歎為
天際翔仙人亦舉手笑我徒奔忙語默付一笑物我當

兩忘獨攜非有生但醉無何鄉

次韻祐父秋懷

詩人固多窮飲水但飢卧誰能趨權門殘冷分涕唾爭
名與馳利到眼不一過居然流俗罪我爾乃同坐得為
荀郎弔失作蒯生賀卻笑貧殖翁高談六雄破愁來挹
黃妳悲至邀白墮感時忽秋吟蟋蟀正相和

依韻恭和御製秋懷

商飈起瘡霄爽氣靜瑤海聖皇撫時運喜色動眉彩蜚

金天口月令
卷一
旗佇西指乘轅行北改濤聲鼓萬壑夜半響竽籟漢儀
欣復見周鼎知德在猗歟沛中歌雲飛風正大

次韻升之叔秋懷

客至得濁酒共飲消百憂涼颼颼短景感此歲已秋忽
驚草木隕尚喜禾黍收九鼎豈不慕二頃亦良謀往聖
實有言未覺富可求

平生八見女而存者五人比又得女少稷作詩見
寬次韻謝之

漸老思似續撫懷良惘然空餘歲寒心凜凜松柏堅平
生孔明婦貧賤房且專生女不生男造物寧我偏孿彼
五嬌兒弄瓦相隨肩人言可禦盜無乃繆以千囊金不
辦嫁擇婿那敢全今年又增一比比安求旃覺貧與覺
富可笑還可憐向來兩童烏泡幻隨變遷應門固未計
疇復與我玄我家豈無人文章紹編箋退之稱其子云固宜常有人文
章紹編箋經心不能釋欲語氣已填筵言晚當見默禱資明
蠲行年且四十那得慰眼前陶公謂勝無此論吾師焉

舒宣儻可待弓求猶足傳

淵明詩云弱女雖非男慰情良勝無則五子亦後出也

今者事方殷煩君費詩篇君詩妙難敵巨刃迎小鮮炯

炯明月珠一一照眼圓吁嗟人生事歲月如奔川豈不

舒我憂熊羆夢豐年蓬門亦何祥但見巾帨懸會當亦

添丁荷鋤賦歸田老妻鼓掌笑子意將誰愆須知百男

惡未若一女賢矧子四壁空蓋頭無尺椽兒女分所定

底用相饒鑄尚應具扁舟江湖窮沂沿為君聘絡秀推

牛事烹煎

明遠次韻超然談道因以謹語為戲將無同耶

忘機亦忘言政作口挂壁因君強一語習氣乃乘隙昨
夕飲君家看朱忽成碧醉歸城南路不記足所歷尚想
兩紅粧翠袖香襍積我歌君為舞舉手還恨窄詩成漫
不省歎我真惡客賸肯來看山未厭一水隔

次韻子雲送兒女至昭亭見寄

巖巖昭亭山度歲一再行吾親在其下有路如砥平風
物歲時佳豈問楚與荆胡為不得往使我涕泗橫出身

備王官敢自頽家聲聖皇察庶獄小大必以情哀矜且
勿喜死當使之生念昔棲閩陬孤童共營營菽水曾幾
何青紫望一經弟兄亦云幸假節仍專城別離乃頻有
僕奴費邀迎安仁賦閒居要自賢西征板輿日歡侍兒
女森在庭豈比隔山岳空書問安寧薄田可負郭不歸
定誰令壯士志中原邊塵暗幽并擬躡冒頓居端謀渭
南耕書生復何事三入老承明應知當饋歎廊廟資扶傾
忍作寒蟬喑願為威鳳鳴

次韻子雲種竹

官居地多隙種竹及春早蕭然三畝園便可事幽討層
巒寓巖石一目惜盡了移根互掩映取徑作深杳飛來
幾烏鵲相喚亦栖繞微風與新月屢舞欣嫋嫋乃知亭
館間有竹自能好堂前藝梅花堂後列萱草叩門有俗
客未至跡已掃遙憐敬亭下巷僻客仍少庭隅方解籜
相對亦社保吟哦五字句飲水良不飽春雷發頭角繭
栗未應小卜居如有得破地出池沼胷中千畝計豈顧

萬事擾他年醉林間準擬成二老

連日得雜花數株藝之池亭感而有作

七十已過半所向意不如一官計大州僕僕畏簡書酒
薄不可醉歌舞見已疎亦有淡生活詩成自相紓池面
數尺地荆棘試翦除為覓桃李花養根待春初日暮公
事已呼童細耘鋤稍稍淨朽壤依依列荒墟歲月能幾
何坐見紅綺舒更須土脈動藝柳分芙蓉賞心固難事
寓目良有餘即此且痛飲三年冀安居勿言傳舍耳吾

生亦蘧廬苟無名利著朝市均樵漁

對梅

吏事紛俗語新詩固難成朝來見梅花詩興還自生江
頭十日雨雲色開小晴高山帶微雪北客眼為明應憐
此花開與雪猶爭衡天公翦六出未敵枝上英蕭然北
牕下冰壺看斜橫坐想南山中晚風千樹清平生一樽
酒肯為桃李傾幽香莫零落送我扁舟行

食田螺

幾年客勾吳盤饌索無有鯉鹹阻彭蜺臭腐羹石首牛
心與熊掌夢寐不到口竭來靈山下空腸尚雷吼苜蓿
映朝餐杞菊富有藪相過有賢士無以侑庖酒跼蹐樽
俎間見此青裙婦百金買市城競拾不論斗枵中本離
化黝質真坤耦稍稍被寒泉累累付清脣舒觴頗甘藜
室戶還畏剖芡薑摘其元璫璨置瓦缶中年消渴病快
若塵赴帚舍漿與文蛤未易較先後吾生亦何為甘此
味豈厚醢之自周官況我乃田叟尚殊鼠供蘇復類蠶

餉柳北風飮竹實南俗夸針取

北人以螺作針吳中富家以銀針食螺

雖

非綠紋酌僅免青泥嘔據龜定應用噉鰕良可醜誰能
事顏色此腹嗟敢負詩成調兒曹吾意真亦偶

雲洞

原注在信州西案此詩據廣信府志補入

揮策度絕壑撐空見樓臺丹崖幾千仞中有佛寺開老
僧如遠公磨門走蒿萊下馬問所適褰衣指崔嵬飛闌
倚石磴曠蕩無纖埃坐久意頗愜爽氣生樽壘仙棺是
何人蛻骨藏莓苔舉酒一酌之慨然興我懷丹砂固未

就白鶴何時來不如生前樂長嘯且銜盃

南澗甲乙稿卷一

欽定四庫全書

南澗甲乙稿卷二

宋 韓元吉 撰

七言古詩

跋北齊校書圖

齊文宣天保七年詔樊遜校定羣書供皇太子
遜與諸郡秀孝高乾和馬敬德許散愁韓同寶
傳懷德古道子李漢子鮑長暄景孫及梁州主

簿王九元水曹參軍周子深等十一人借邢子才魏收諸家本共刊定祕府紕繆于是五經諸史殆無遺闕此圖之所以作也山谷所謂士大夫十二員今范明州謂逸其半者皆是矣至唐已隔周隋二代不知何自得其容貌髣髴耶高氏起北方以兵力奮然敦尚儒風立石經興黌序定尚書于涼風堂質經義于春宮意當時文士亦歆豔之故相傳于圖畫哉流及後裔文林

之館既興御覽之書繼作無愁之聲已播于天
下不揀其亡故予感而賦之云淳熙八年正月

庚申韓某題

高齋校讐誰作圖一時紬書亦名儒網羅卷軸三千餘
俗儒非真類迂愚雌黃是正定不無虛文末學徒區區
豈識治道通唐虞文林高館希石渠後來御覽嗟何書
修文偃武事益誣轉頭鄴城已邱墟我冠廣袖長眉鬚
丹書寫此猶不渝高鬟侍女曳紅裾兩駢帕鞞立奚奴

罷琴涉筆傾酒壺蘭臺供擬信樂歟不知畫手安用摹
無乃逞巧聊自娛千年視之一款戲君不見文皇學士
十八人謀猷事業皆功臣瀛洲舊圖應更真諸君尋觀
為拂塵

陸務觀寄著色山水屏

我居面山俯潺湲憑軒卧牖皆見山山光水影入懷袖
秀色爽氣非人寰故人憐我新結屋猶恐看山未能足
丹青寫作何許圖不礙閉門聊縱目千峯繚繞生白雲

小舟蕩漾橫江濱樓臺高下出蘭若杳渺似有鐘磬聞
坐驚巖壑環四壁寥落高秋變春色方壺瀛洲遠不隔
武陵桃花定誰識君不見韋侯絕筆畫古松黑雨白日
摧虬龍杜陵老翁三歎息況有山木洪濤風又不見王
堂真仙草詔罷靜愛春山郭熙畫文章信美身不閒清
嶂白波眼中借我今乘間身未衰秋藜獨步哦新詩出
門見山入見畫佳興自喜來無時卧龍山腰鏡湖尾知
有高齋照清泚功名逼子未得休歸坐玉堂應記此

檢詳出示所賦陳季陵戶部巫山圖詩仰窺高作
歎息彌襟范成大嘗考宋玉談朝雲事漫稱先王
時本無據依及襄夢之命玉為賦但云頽薄怒以
自持曾不可乎犯干後世弗察一切溷以媒語曹
子建賦宓妃亦感此而作此嘲誰當解者輒用此
意次韻和呈以資拊掌

瑤姬家山高挿天碧叢奇秀古未傳向來題目經楚客
名字徑度岷峨前是耶非耶莽誰識喬林石廟常秋色

暮去行雨朝行雲翠帷瑤席知何人峽船一息且千里
五兩竿頭見幡尾仰窺仙館至今疑行人問訊居人指
千年遺恨何時伸陽臺愁絕如荒村高唐賦裏人如畫
玉色頰顏元不嫁後來飢客眼長寒浪傳樂府吹復彈
此事牽連到溫洛更憐塵襪有無間君不見天孫住在
銀河滸塵間猶作兒女語公家春風錦瑟傍莫為此圖
虛斷腸

題陳季陵家平山圖一首

案此首即前韻疑卽所謂
檢詳出示者恐非韓元吉

作今無別本可
校姑仍其舊

蓬萊水弱波連天五城十二樓空傳行人欲至風引船
不知路出巫山前巫山仙子世莫識十二高峯作顏色
暮去朝來雨復雲却將幽恨感行人江流東下幾千里
日日飢鴉噪船尾靈帳風生酹酒漿古廟煙青客遙指
崧高漫說甫與申道旁況有昭君村娥眉妙手不能畫
枉學瑤姬夢中嫁黃牛白馬江聲寒昭君傳入琵琶彈
漢庭無人楚宮遠陽臺寂寞空雲間君家此畫來何許

照水煙鬟欲相語要須嬌服令侍旁不用作賦迴枯腸

鄭仲南五梅圖

江南酒美樽不空十年醉倒梅花中經行所見略可譜
一一秀骨含仙風不將鉛華污真色亦有醉臉勻春紅
重英千葉兩何好玉立但喜肌微豐紅綃金縷變新樣
品異獨許天香同花開到處即吾圃水寒月淡煙空濛
醉來踏雪更起舞長歌目送南飛鴻自後春歸厭寂寞
坐覺桃李難為容忽驚橫軸入吾手世上猶有丹青工

扶疏清影卧空碧一笑似喜會相逢君家亭館安用此
此物自昔添詩窮詩成妙手儻不惜畫我曳杖穿芳叢

龜峯行

吾聞靈龜不願死有用于清廟但願曳尾安泥塗所以
漆園吏坐歎清江使者逢豫且龜峯之龜定何物不在
泥塗之下乃在萬仞之上高突兀是耶非耶遠莫測安
然不動藏其穴伊昔帝堯有聖德此龜無乃負圖出圖
成授帝埋其骨猶使琢石志之存髣髴又疑神禹碑刊

在衡山巔碑高上與日月並此猶其跌棄不取神鬼守
護踰千年我欲詰其端此事恍惚無迹往往皆在太古
前斗中神人被髮立蜿蜒佐之從汝蟄九陰司存當在
此今汝巢南失其職又聞巢縣事頗似伊尹生空桑母
嫗避水欲徙去待汝兩眼生赤光遂令萬室之邑化作
魚與鱉汝乃遁走至此藏上天震威趣汝壽使汝扶服
死且僵醜形質磔在石筍上不可以鑽不可以灼不可
以搯牀奈何猶復不自斂荒崖斷壑反以名字彰因思

支祁鎖頸泗水中帝以巨鎮岌嵒壓其宮名之以山不以峯豈有形狀與此同吁嗟此山氣象槃礴亦雄偉奇峯羅列三十二或如威鳳昂其喙或如俊猫立且戲石鍾孤撐危欲墜蜃樓矗起見天外大眺么麼不足記神旗鐵壁非一類何用獨取汝之名字豈汝黠且庸鼓妖術怪百里內使汝生存跌宕安可制我初信汝靈今復知汝凶江湖波濤洶湧不一濡汝足雲霧呼噏陰晴變態猶無窮不知造物安用此徒以動蕩耳目夸兒童何

時巨靈引手擲汝八荒外舉頭直見天穹窿

永豐行

丹陽湖中好風色晴日波光漾南北湖岸人家榆柳行
風颭低昂似迎客繫船並岸聊一呼老農指是官田圩
長衫紫領數百輩見我羅拜長嗟吁政和回頭五十載
官長築圩宛然在東西相望五百圩有利由來得無害
官圩民圩奚所拘此地無田但有湖圍湖作田事應爾
底用徹地還龜魚民圩不堅自招水水潦何常鎮如此

官圩六十里如城削平為湖定何里請看今來禾上場
七百頃地雲堆黃縣官糴米三萬斛度僧給牒能商量
我聞此語汗生面千聞豈如目一見吾君神聖坐九重
輕易獻言誰復辨卻憶吳中初夏時畚鍤去決田湖圍
雞驚上籬犬上屋水至不得攜妻兒無田赴水均一死
善政養民那得爾寄言父老且深耕為汝馳書報天子
建德道中

風雨回頭已十日野花狼籍春可惜水深泥滑行路難

但見千山好顏色青青稻畦初布秧人家掩扇蠶事忙
駕言有程不可駐鷄鳩一聲歸夢長

桐柏觀三井龍潭下為瀑布

一水赴壑如奔雷兩山壁立堅誰開山高石限水不去
萬古鬬怒何轟虓盤渦散作鍾與釜往往石上相縈迴
泓渟歲久深莫測人言海眼良可猜不知蛟龍底無用
局促石竇真窮哉未能九土霈一雨尚與千里清炎埃
往時金蚪墜玉簡中使奉詔從天來百年舊事今寂寞

但有雪浪飛崔嵬杜鵑花開蘭正發雙闕萬丈晴雲堆
寒聲徹耳心骨爽凌風一上吹笙臺

玩鞭亭

黃鬚鮮卑勇無策自馳駿馬來窺賊賊奴但怪日繞營
起看飛塵已無跡寶鞭不惜棄道傍坐令老嫗知興亡
百年社稷有天意奸鋒逆焰徒鴟張孤城遺跡森在目
平湖無波春草綠卻對青山憶謝公公老猶嫌人姓木
邊兵已重朝士輕中原有路何由行柙中虎兕不可制

江左夷吾浪得名

魯公堂

魯公之節非一死其誰碑之子曾子魯公之德人未知
其誰堂之張紫微繼公作郡五百載登堂思公宛如在
江南遺墨處處傳魯公去作麻姑仙一杯相與借風月
但見雲碧開池蓮紫微聲名今第一歸上鸞臺應不日
笑談千里無兵戎臨川草木生春風他年道傍兒女說
不思魯公思張公

歸耕堂

退之手板愧丞相淵明束帶羞督郵紛紛雀鼠待一飽
豈若植杖耘西疇劉郎大耳最巨信剛道田園不可求
摩挲髀肉事鞍馬堅卧百尺營高樓安知南陽扶耒手
談笑為君分九州我來龜溪二三載此策未辦誠淹留
喜君負郭有餘地百金賣劍歸換牛樹頭布穀曉相應
築室坐占林塘幽詩成使我佳興動叩角便作商聲謳
他年釜旣得長滿區區肯顧監河侯

李編修器之惠詩卷

塵埃僕僕日走趨胸中倒懸一字無迫人簿領推不去
眼明忽見千驪珠矍然驚呼此詩歟如醒乍解病獲蘇
歸來明燈喜無寐手不忍釋自卷舒語新格健意有餘
風骨峭硬中含腴猛如橫陣舞刀槩清若雅宴調笙竽
我窮已極君益迂學此似費千金屠前有太白後長吉
君家詩名宜復初明明天子開石渠歎我短後追長裾
時平合第從臣頌請君早上承明廬

少稷勸飲每作色明遠忽拂袖去戲呈

無多酌我蓋司隸不能滿觴田將軍坐中幸免沐猴舞
且復周旋非貴人人言勸飲無惡意君胡作惡使客起
少陵亦遭田父肘況我忘形友君子從今勿勸亦勿辭
我欲眠時君自歸先生一斗一石醉莫問喧爭與嘲戲

戲韓子師

讀書堂前霜月明讀書堂後霜風聲主人讀書已萬卷
足踏省戶還專城竭來卧掩關不出左擁韋編右瑤瑟

似聞天女亦愛靜便喜蘭房長英物我舍應門繞一兒
趙子尤作仙果遲白頭相看輒浩歎玉樹獨滿君家墀
我歌聲長君且聽不特交遊幸同姓極知王盜有新醅
每恨金觴乃無柄事見趙子從君泥飲不作難景物過清天
復寒犀錢湯餅未免俗琵琶與箏當合彈

戲贈范元卿

憶昔茗溪醉中語屈指淒涼十寒暑紛紜世事去如雲
兩鬢蒼蒼各如許春風學省數會面抗袂吁嗟走塵土

我慚屢戰不能奇，袖手歸來仆旗鼓。
喜君射策有奇功，雙鵠聯翩仍一舉。
胡為不上金馬門，簿領卑棲猶噲伍。
風前未厭鷦鷯翮，敝筆下懸玄鳳凰。
吐閩山千里，要佳句應弔雙龍。
一懷古元戎，好士見此客，定肅弓刀，按歌舞。
素英丹荔，雖已過海珍，正可羅樽俎。
鷓鴣勾舟木葉墮，秋晚上寒更風雨。
請君彊飯趣歸程，莫為梅花思羈旅。

次韻沈信臣遊龍焙

武夷仙人厭塵埃，金鞭白馬飛崔嵬。
丹砂已就不可識，

尚有瑤草分靈栽
千花剪巧綴密露
秀色不待春風催
東溪路入三千里
山如舞鳳連翩來
槍旗未動供採掇
壘鼓夜作空山雷
蒼虬繞圭龍護壁
面為鐵石口瓊瑰
烹煎鬪水出好事
珠璣玉字相縈迴
已嗟雙井甘退步
况復日注真難儕
我來竊食端為此
把玩一日三徘徊
手斟清泉吊陸子
底用濁酒窮歡咍
頭風快愈春睡散
老眼尚為羣書開
知君此遊更不惡
坐有纖纖時捧杯

杜牧之詩茗益纖纖捧
信臣載後乘以遊故云

重九日中甫子雲二兄會別龍山

秋風作霜楓葉丹扁舟未發龍山灣山頭窄堵半天出
十年笑我幾往還今年結束值重九愛此山水照高寒
親朋話別情總厚兄弟白首仍蒼顏相留一笑不易得
爭挈美酒羅盤餐登高正爾在高許下視擾擾真塵寰
追思姑孰有故事雅宴亦復同此山雖云小異得佳客
主人鬚眉懷胃好滄波至今洗遺恨豈若我輩同清歡
是時郊原新雨足歷歷煙樹明江干放懷自知人境異

極目頓覺天宇寬
惜無五絃寄妙手
已有征鴈橫雲端
南飛休論九萬里
東游更渡五百灘
明宵酒醒會相憶
夢繞百級憑飛欄

送朱元晦

前年恨君不肯來
今年惜君不肯住
朝廷多事四十年
愚智由來各千慮
君來正值求言日
三策直前真諫疏
詆訶百事推聖學
請復國讐施一怒
天高聽遠語不酬
袖手翩然尋故步
我知君是諫諍才
主上聰明得無悞

一紙底用教鵲冠百戰應當啓戎輅江山千里正風雪
歲月崢嶸倏將暮有田可耕屋蓋頭君計未疎吾亦去
君歸為謝武夷君白馬搖鞭定何處

送許侍郎知宣州

我公名滿東西川一持使節幾十年橋經萬里坂九折
兒童學語知公賢上皇詔下嗟見晚歸來荷橐趨甘泉

平生所學欲盡試新語僅奏囊中篇

公獻所著書
太上皇稱善

兩淮

破碎賴整理百工盡敝資饒鐫念公雖老猷自壯何謂

宜去請益堅玉音三喻不可挽一麾且復臨江孺宣城
景物今更妍水瓜如瓠栗如拳敬亭山下躡遊屐疊嶂
樓中呼酒船謝公已往詩句在公有妙語真齊肩卻招
李白弔杜牧收攬風月酬雲煙中原未復敵未滅政成
請公須著鞭吾君有意詢黃髮廟堂之謀當萬全

送蘇季真赴湖北憲司屬官

憶昔聞君未相識春雨繫船吳市側逆風白浪不成行
坐聽親朋談歷歷豈意飄零晚相見俱捧江東從事檄

拙鳩未省厭榆枌威鳳誰令安枳棘今年喜君若有遇
去我還為遠行役一樽忍話故園事童穉吁嗟髮今白
君家聲名塞宇宙翰墨縱橫富奇策未容世職踐明光
聊佐輜車司郡國衡山洞庭忽在眼禹牒黃車有遺跡
詩成不用弔靈均為訪桃花招隱客

偶得佳酒懷尹少稷聞其連日致齋在臺作長句
寄之

孔君一月二十九日醉太常一年三百五十九日齋人

生百歲駒過隙直與外物勞形骸君非太常何用爾監
祭有令時當差朝廷禮備百神秩不比媚與猶燔柴念
君幾日得閒暇歸昨饜飫妻奴哇重門咫尺不得見使
我有酒空相懷憶昔過從水南寺風廊雪屋靡不偕靈
山懷玉了在看蒼翠突兀石筍鐵柱如籤排醉來起舞
對山水狂歌亦和襄陽簿一時取樂未云足後會回首
何其乖今者相逢號朝士僕僕聽鼓趨天街欲觀禮樂
問文物但見鞀鼓鳴江淮喜君頭上冠作薦文筆愈健

詩愈佳青雲萬里要直氣幸勿觸狐當觸豺我今勃窣
百僚後自覺迂鈍難為儕一杯耳熱不共醉夜長獨坐
燒寒褶隔牆降將新授節絲竹間響駢金釵時逢富貴
雖可羨擾擾得失真蠅蝸江山到處有佳趣故應赤舄
輸青鞵明年春風我欲賦歸去佇君功成作頌磨蒼崖
方務德元夕不張燈留飲賞梅務觀索賦古風

昨日風雨今日晴綠水橋南春水生使君元夕罷高宴
亭午邀客花間行危亭直上花幾許水仙夾徑梅縱橫

不須沈水薰畫戟簾幕自有香風清門前紛紛烏鵲亂
隱几坐愛寒江明憶昨淮南戎馬動豈謂景物還新正
遺民歸公十萬口擊鼓日日嚴刀兵眼看指麾盡摩撫
閭里愁歎成歡聲酬功端合侍玉輦安得坐嘯江干城
景龍燈火公尚記耆舊出語兒童驚我來兩月濫賓客
況有別駕能詩名相從一笑說萬事重費美酒勤杯觥
東風搖蕩入煙柳歌管錯雜催離情詔書徵拜那可後
為公前馬遙相迎

次韻少稷梅花

君不見江城梅花春欲動剪冰仙人作花供客來酒盡
甘啜醕常恨公田無秣種雪晴梅蘂更可愛百匝來看
地猶凍杖藜一笑答春風豈必鳴鸞與歌鳳幽香要自
己心清冷艷不禁還目送興來往往得佳句落紙揮毫
字尤縱卻驚車陣有勦敵旋結趙叟盟衡雍孤芳未省
須刻畫百卉應先厭嘲弄我如蟋蟀鳴苦遲君似驊騮
驟難控相如上林晚奏雅靈均喜橘工記諷不妨聊繼

廣平公東閣疎枝與君共

土人池中有新荷戴錢而出者少稷明遠相率賦

詩戲作長句

君不見紫髯將軍射無敵志目中眉猶動色晚年驚見
賣油翁一綫穿錢曾不失人言手熟會當爾世事由來
真一劇紛紛刻楮技已窮厭看人力須天工湘妃撫掌
漢女笑為我試手馮夷宮芙蓉生葉不自展胡為正在
阿堵中青銅翠羽光相映莫遣游魚動荷柄芳心滿眼

誰得知坐使詩人發嘲詠我言羞澁囊久空井中飛蜨
那得逢不如青鴨為銜去贖買明月酬清風

觀蓮

廣寒仙子霓作裳夜從宓妃欸英皇朝游洛浦暮瀟湘
紅粧翠羽森成行仙姿不作時世妝或凝朝霞豔秋霜
臨流顧影濯滄浪游魚屬玉雙鴛鴦長庚北斗相低昂
笑中如花語如香徘徊醉著清漏長炯然開奩照湖光
湖風吹水洒面涼明珠落佩千鳴璫碧簫宛宛中可觴

為君行歌酌天漿瑶池玉井遙相望歸舟浮空月茫茫

同尹少稷賦巖桂

江南秋盡猶無菊只有幽香滿巖谷紛紛千樹散黃金
翠葉離披剪寒玉繁枝疑從缺月墮嫩蕊不受微風觸
芳枝冷淡誰與妍霧雨陰晴自膏沐不妨松竹共行伍
要使芝蘭盡臣僕小山有句嗟未盡騷經已斷誰能續
每至凋零足惆悵尚喜爐薰駐餘馥為君掃地斗量歸
猶勝胡椒夸百斛

隆興甲申歲閏月游焦山

案此詩據鎮江府志補入

荒村日晴雪猶積繫纜焦公山下石江翻斷崖石破碎
瘞鶴千年有遺跡瘦藤百級躋上方浮玉南北江中央
檣竿如林出煙浦酒船遠與帆低昂老鷁盤風舞江面
殺氣淮南望中見神龍只含水底眠為洗乾坤起雷電
觀音巖前竹十尋大士不死知此心醉歸更喚殷七七
勝種好花開鶴林

南澗甲乙稿卷二